

Darasiza norĩ

Darasiza norĩ ma, Paru te te ĩrob'ui'érezé

Ĩbaihã wasu'uzé

ZeZusi hã hãiwã u apã ĩmorĩzéb u hã, zudezu norĩ si ma tô ĩsimirowasu'u na te te 're saze za'ra. Ta norĩ si te uburé sihãiwata nhĩhãri ré 're hãimana za'ra, 'Re ĩhãimana u'ãsi mono hã Abra'ãhã ma, te te ĩpisutuzéb zarina. ZeZusi hã hãiwã u apã morĩ za'u si, ma tô ĩwasu'uwě hã datême ropé, zudezu'õ norĩ u hã, ĩsihãiwata nhĩhãri'õ norĩ u hã.

Ni'wam norĩ hã zudezu norĩ hã Darasiza na danhipti'a nho'õmo nhisi ãma 're ĩsi'ubumroi mono norĩ hã ma tô Paru hã zudezu'õ norĩ ma wasu'u za'ra, ĩsimiroti na te te ãma ĩ'uwaimrami õ na hã. Ta norĩ hã ma tô ãne hã dama roti za'ra: 'Re ĩhãimana u'ãsi mono nhimiroti 'rata na Mozési te te ãma ĩrob'ui'ére zama te za da te 're 'madãã pese za'ra, te te 're da'awěsãmri mono da. Taha da, te za duré 're dasihãiwata nhĩhãri za'ra. ãne na roti hã Paru hã ma tô siwi wě'õ pese. ZeZusi hã wazada dã'ã wa, duré taha zarina wawasédé hã te te wama 're aparĩ mono wa, dasihãiwata nhĩhãrizé hã marĩ dai õ di. ZeZusihi wapru na si te za te te 're da'a'upsõ, dawasété wi. ãne wa, ma tô Paru hã tãma rob'ui'ére za'ra, Darasiza norĩ ma hã, aimawi hã te te 're 'manharĩ za'ra mono tô da, ZeZusihi si te te sina 're umnhasi pese za'ra mono da, taha zarina si 'Re ĩhãimana u'ãsi mono pě'ezani hã ĩpě'ě 're, 're sãmra za'ra mono da.

1 1-2 Wanhĩb'apito nhĩb'a'uwě norĩ, daza'rui mono bã Darasiza na danhipti'a nho'õmo nhisi 'remhã 're aihãimana za'ra wa'aba mono norĩ, wa hã Paru, wa ãma asawi za'ra wa'wa. Uburé wasiré ĩsazei'wa norĩ hã te duré timreme na ãma asawi za'ra wa'wa, ĩ'rata ĩsi'ubumro norĩ hã. ãne wa za ãma aima rob'ui'ére za'ra wa'wa. Wa hã ZeZu Cristuhu zadawa wasu'u'wa, wa 're mo, ĩsadawa para. Ni'wam norĩ hã te te siwi ĩpisutu õ di, dazadawa para ĩsadawa wasu'u'wa na 're ĩhãimana mono da. Mare uptabi di. ZeZu Cristuhu si ma tô Wamama me si, sima ĩpisutu zahuré, ab're hawi ti'ra hãiwã'utu'wai me.

3 Wamama ma, wa ai'ãma 're ĩmreme u'ãsi za'ra wa'wa, 'Re ĩhãimana u'ãsi mono ma, duré Wanhĩb'apito ZeZu Cristuhu ma zama, ĩsimizawizé hã ai'ãma 're hãimana u'ãsi za'ra wa'aba mono da, rowě u'ãsi, ãma 're anomro aba mono da.

4 Wanhĩb'apito 'Re ĩhãimana u'ãsi mono te te tãma ĩwězéb uwaibaba, ma tô ZeZu Cristu hã wazada sisõ, wazada dã'ã da, te te

wa'awa'âbâ da, 're wanomro wasété mono wa, 'Re îhâimana u'âsi mono te te wahâ za'ra tō da, rob'rāsutuzéb âma hã, duré dapo're'õ na 're îdanomro mono norĩ ne, 're wanomro u'âsi tō mono da. ⁵Wamama hã wẽ uptabi wa, âma 're wawata u'âsi za'ra wa'aba mono.

**Aimawi rowasu'u hã Wanhîb'apito wasu'uwẽ ne,
aiwa 're 'mai'hâimana mono õ na rowasu'u**

⁶ Âhãna wa ai'âma ãtob'uzu za'ra wa'wa. E marĩ wa. Tãma asawi uptabi za'ra wa'aba wa, ma tō Cristu hã asõ'reptu za'ra wa'wa. Taha zarina, 'Re îhâimana u'âsi mono hã ma tō sima aipisutu za'ra wa'wa, ãsib'a'uwẽ si oto 're anomro aba mono da. Tane nherẽ, ma tō aiwara sina, 'Re îhâimana u'âsi mono wi 're aipizari za'ra wa'aba mo, asimirosa'rata na, aimawi rowasu'u hã Cristuhu wasu'uwẽ me aiwam newa. ⁷ Aimawi rowasu'u hã Cristuhu wasu'uwẽ me, aiwa 're hâimana mono õ di. Mare uptabi di. E marĩ wa, wa tō âne aima waihu'u za'ra wa'wa. Ni'wam norĩ hã ma tō sima wẽ za'ra, Cristuhu wasu'uwẽ upana te te âma saprĩ za'ra da, aimawi rowasu'u u. Ta norĩ hã ma tō aimawi tinhimirowasu'u na aiwi ro'wa'rutu za'ra wa'wa. ⁸ Wa norĩ hã wa tō aima rowasu'u za'ra wa'aba ni, Zezu Cristuhu wasu'uwẽ na. Tane nherẽ, nimahã na Cristuhu wasu'uwẽ upana, wa te dama 're rowasu'u za'ra mono wamhã, te za 'Re îhâimana u'âsi mono hã te te 're wa'awẽ'õ pese. Tane duré nimahã na hãiwa âma tãma ãromhuri'wa norĩ hã ãwasu'uwẽ upana, we te te dama 're rowasu'u za'ra mono wamhã, te za duré te te siwi 're awẽ'õ pese. ⁹ Âne hã wa tō aima waihu'u za'ra wa'aba ni. Taha wa, wa za duré aima âma sahu za'ra wa'wa, wa te aima ãwaihu'u za'ra wa'aba zém na. Ni'wam norĩ hã wanhimirowasu'u zarina si, Zezu Cristuhu wasu'uwẽ na te te dama 're rowasu'u za'ra mono õ wamhã, te za 'Re îhâimana u'âsi mono hã te te siwi 're awẽ'õ pese. ¹⁰ E ãnhimiroti na ããma 're ãdawata za'ra mono zéb zô, wa ãsina 're ãnhimipari. Mare di. 'Re îhâimana u'âsi mono si ããma 're ãwata mono zéb zô si, wa ãsina 're ãnhimipari. Ti'ai âma ããma 're dawata za'ra mono da, râwi ãsi'uihã na te ãsina 're rosa'rata mono 'wa'âhã, Zezu Cristuhu ma romhuri'wa, 're ãhâimana mono õ di aré.

¹¹ ãsisãnawã norĩ, ma'ãpé niha we ããma waihu'u za'ra wa'aba. Ti'ai âma 're ãdahâimana za'ra mono norĩ nhimirowasu'u zarinai õ di, Zezu Cristuhu wasu'uwẽ te dama 're ãwasu'u mono hã. ¹² Ni'wa âne na hã te te âma 're ãpo're pu'u mono õ di, ti'ai âma wasiré 're ãwahâimana za'ra mono norĩ hã. Ni'wa hã te te duré ãma 're rowasu'u mono õ di, te ãwaihu'u pese zéb da hã. Mare di. Si'uihã na ma we hãiwa hawi ãma siwaihu'u Zezu Cristu hã, ãwasu'uwẽ na te ãwaihu'u pese zéb da hã.

**Paru hã Wanhib'apito zadawa wasu'u'wa na te te
ĩsãna'ratazém na ĩsiwasu'uzé wasu'u**

13-14 Wa hã wasiré zudezu norĩ nhimizazezéb zarina 're ĩmorĩ ré, wa tô ĩsima wẽ upta, wasiré ĩwaprédu mono norĩ nhipai u, wahi'rata norĩ nhimiroti zarina si, 're ĩmorĩ da. Āne 're ĩmorĩ ré, 'Re ĩhâimana u'âsi mono nhib'a'uwẽ norĩ ma, ĩwasété na wa tô te 're arob'manharĩ aré, Wanhib'apito zazei'wa norĩ ma hã. Wa tô te ĩsima 're awẽ, te 're uprosi mono da. Āne ma tô ĩwasu'u wasédé hã 're ĩwapari za'ra wa'aba mo.

15-16 Tawamhã bádâ ma tô oto ĩwa waptārã, 'Re ĩhâimana u'âsi mono ti'ra te te ĩma ĩwaihu'uzém na, ĩra wasu'uwẽ na si, zudezu'õ norĩ ma, te 're wasu'u mono da. Taha da, ĩpoto õ ré, ma tô sima ĩpisutu siro, 'Re ĩhâimana u'âsi mono hã. Taha wa, tãma ĩzawi uptabi wa, ma tô oto ĩzô hã, tãma ĩromhuri'wa na oto 're ĩhâimana mono da.

Tawamhã e 'wa hã wa tô sadawa pibu, āne zarina te dama 're ĩsadawa wasu'u mono da hã. Mare di. Ni'wa hã āne na te sadawa pibui õ uptabi di. 17 Duré Zeruzarẽ u, a'â ĩmorĩ õ di, Cristu hã tizadawa wasu'u'wa da, ĩwana te te sima ĩpisutu za'ra norĩ u, te sabu za'ra da. Mare di. Daza'rui amoi u si, wa tô a'â mo, Arabiza u. Tame ĩnhamra pari, wa tô apâ mo, Damasitu na 'ri nho'õmo nhisi u. 18 Si'ubdatõ ma tô oto ĩãma tiwahu, Wanhib'apito āma te ĩsasõmrizém na hã. Tawamhã Zeruzarẽ u wa tô oto mo, Pedru hã te hãiba pibu da. Tame ma tô romhuri hã maparane ĩãma ai'utõ, ĩrata ĩnhamra ré. 19 Pedruhu siré norĩ hã aihĩni te sõpētẽ za'ra õ di, Cristuhu zadawa wasu'u'wa norĩ hã. Ti'aduhu si, wa tô sõpētẽ. Wanhib'apito sisémemhã ta hã.

20 Tô sena, wa rob'ui'ére na aima rowasu'u za'ra wa'wa, 'Re ĩhâimana u'âsi mono nho'a.

21 Tawamhã Zeruzarẽ hawi wa tô oto watobro, daza'rui u ĩmorĩ da, Siriza u, duré Sirisiza u. 22 Zahadu te te siwi ĩhãiba pibu za'ra õ di, Zezusihi zazei'wa norĩ hã daza'rui mono bâ, Zudeza na danhipti'a nho'õmo nhisi āma siré 're ĩsi'rã'õtõ mono norĩ hã. 23 Taré ma tô ĩwasu'u wẽ si te te 're wapari za'ra, ta norĩ hã. Āne ĩwasu'u wẽ hã: “Paru hã ma tô te te wa'ãma 're arowasété aré, Wanhib'apito āma, wa te 're sasõmri tõ za'ra mono da. Tane nherẽ, Zezu Cristuhu wasu'uwẽ na te oto te te 're da'apawapto, Wanhib'apito āma da te 're sasõmri za'ra mono da.” Āne na si ma tô ĩwasu'u wẽ hã te te 're ropé. 24 Taha wa, Wanhib'apito zazei'wa norĩ hã, 'Re ĩhâimana u'âsi mono āma si, te 're wata u'âsi za'ra, te te ĩnho'reptui wẽ te.

Ti'adu norĩ u, Paru norĩ ĩsihutuzé wasu'u

2¹ Tawamhã 14 na ĩãma wahu pari, wa tô apâ mo, Zeruzarẽ u. Tamomo ĩmorĩ wamhã, Banabé hã te ĩsiré mo. Titu hã wa duré

ĩsiré saprõ. ² Re ãhâimana u'âsi mono hã za apã ĩmorĩzém na, te te ĩma waihu'u sirõmo wa, wa tô apã mo. Tawamhã 'ri nho'õmo u wasihutu wamhã, aibã dama ĩpire na 're ãhâimana za'ra mono norĩ me, wa tô wahãiba pisutu wasi'rã'õtõ ni. Taha wa, wa tô ta norĩ ma ĩsiwaihu'u, zudezu'õ norĩ ma, Wanhib'apito wasu'uwẽ hã te tãma 're ĩwaihu'u za'ra mono zém na. Te te ãma ĩzaze za'ra zõ, wa tô ĩnhimiromhurizém na tãma ĩsiwasu'u za'ra, te te ãma ĩzaze za'ra õ wa, taré 're hãimana mono tõ da, ĩnhimiromhurizé hã. ³ Tawamhã ma tô ta norĩ hã ãma ĩzaze za'ra, zudezu'õ norĩ ma, te tãma 're ĩrowasu'u za'ra mono zém na. Taha wa, te te siwi pisutu za'ra õ di, Titu hã ĩsiré 're ĩmorĩ hã, sizudezu da. Titu hã deredu na ĩpodo, zudezu'õ. Tane nherẽ, te te siwi pisutu õ di, sihãiwata nhizãri ré 're morĩ da, tawapsi sizudezu da. Mare di. ⁴ Ni'wam norĩ si, zudezu norĩ hã ma tô ĩ'upana sima wẽ za'ra, Titu hã sihãiwata nhizãri ré 're morĩ da. Ta norĩ hã wasiré Wanhib'apito zazei uptabi 'wa 're nomro mono newa, ma tô hãimana nhipese sina wasiré 're si'rã'õtõ, wapsã'i'a ne wahãimanazé ma, te te 're ropibu za'ra mono da, rowẽ na 're ĩwahãimana za'ra mono zéb zõ, Cristu Zezusihi ãma. Ta norĩ hã zudezu norĩ hã, ma tô sima wawẽ za'ra, ĩsine 'Re ãhâimana u'âsi mono nhimiroti 'rata na rob'ui'ére zarina, wa te 're rob'manharĩ u'âsi za'ra mono da, taha zarina wanho'reptuzé hã wa te wasina 're uwaimrami za'ra mono da newa. ⁵ Tane nherẽ, ta norĩ nhimirosa'rata na, wa te ãma saze za'ra õ di. Mare uptabi di. Wa tô wasima wẽ za'ra ni, Zezu Cristuhu wasu'uwẽ uptabi si, aima 're hãimana za'ra wa'aba mono da. Taha wa, ta norĩ nhimirosa'rata na hã wa te ãma saze za'ra õ di.

⁶ Dama ĩpire za'ra norĩ ma, ĩnhimiromhurizém na tãma ĩsiwaihu'u za'ra parimhã, marĩ asa te te ĩma waihu'u za'ra õ di, ĩsada wa nhipai u, zudezu'õ norĩ ma te tãma 're ĩrowasu'u za'ra mono zéb da hã. Ta norĩ hã pire na dama 're hãimana za'ra mono nherẽ, ĩpire na te 're rosa'rata mono õ di, wa hã. E marĩ wa. 'Re ãhâimana u'âsi mono hã dapire na te te da'ãma 're rosa'rata mono õ wa. Tãma taré hã. ⁷ ãne si ma tô aibã norĩ hã siwi ĩwaihu'u za'ra, 'Re ãhâimana u'âsi mono tô sena te te ĩpisutu na, zudezu'õ norĩ ma, Wanhib'apito wasu'uwẽ hã te tãma 're wasu'u za'ra mono da, Pedru hã te te ĩpisutu ne, tisiré zudezu norĩ ma, te te 're rowasu'u mono da. ⁸ 'Re ãhâimana u'âsi mono hã ma tô Pedru hã te te 're pawapto tiwaihu'u pese na, tisiré zudezu norĩ ma, Cristu hã te te tãma 're ĩwasu'u za'ra mono zéb da hã, ta norĩ u si te te satõrĩ wa. Tane duré wa hã tiwaihu'u pese na ma tô te te 're ĩpawapto, zudezu'õ norĩ ma, Cristu te tãma 're ĩwasu'u za'ra mono zéb da hã, ta norĩ u si te te ĩzatõrĩ wa, wa hã. ⁹ Taha wa, ma tô oto Ti'adu norĩ hã ĩ'ãma waihu'u za'ra, tãma ĩzawi pese wa, 'Re ãhâimana u'âsi mono te te

sima ĩpisutuzém na hã. Ô norĩ hã ĩsimiroti pire na ma tô Wanhib'apito zazei'wa norĩ hã ãma waihu'u za'ra, Ti'adu hã, Pedru hã, duré Zuwã. Tawamhã ta norĩ hã 'Re ĩhâimana u'âsi mono te te ĩpisutuzém na te te ĩãma waihu'u za'ra wa, ma tô tinhib'rata na siwi wazawi za'ra, Banabéhé me. Wama wê za'ra di, wa norĩ hã zudezu'ô norĩ u si 're waneb da, Cristuhu wasu'uwê na, wa te tâma 're romhuri za'ra mono da. Duré wama wê za'ra di, Ti'adu norĩ si, tisiré zudezu norĩ u si 're nomro mono da, Pedru norĩ me. ãne na wa tô wanhimirosa'rata na wasisaze za'ra ni. ¹⁰ ãne si ma tô wama waihu'u za'ra, Ti'adu norĩ hã, Wanhib'apito zazei'wa norĩ ĩsima'ĩô norĩ hã wanhimarĩ na wa te 're pawapto'ob u'âsi za'ra mono da, 're wapo're simrami za'ra mono ãna. ãne zô, wa ĩsima te 're rosa'rata u'âsi, ĩwê na si te 're da'apawpto mono da.

Paru hã Pedruhu ma te te ĩrowaihu'uzé

¹¹⁻¹² Tawamhã Ātizotiza ãma ĩnhamra ré, ma tô wi Pedru hã, ĩzarina. Tawamhã zudezu'ô norĩ ãma ĩnhimirosa'rata na te te upai wa, wa tô danho'a tâma rowaihu'u. ãne tinhimirosa'rata na te te ĩ'upazé hã. Ātizotiza u wisi wamhã, ma tô aré zudezu'ô norĩ me 're sa, Wanhib'apito zazei'wa norĩ me hã. Tawamhã ĩsarina si ma duré aibã norĩ hã aihutu, Ti'aduhu hawimhã. Ta norĩ hã ma tô te te sima 're wê za'ra, Wanhib'apito zazei'wa norĩ zudezu'ô hã, sihâiwata nhihãri ré si 're nomro mono da, tawapsi sizudezu za'ra da. Tawamhã zudezu'ô norĩ hã, Wanhib'apito zazei'wa oto wasiré 're wahâimana za'ra mono nherê, ma tô Pedru hã tiwi sisawi za'ra, oto dasiré 're sa tō mono da. E marĩ wa. Zudezu'ô norĩ siré 're sai u'âsi mono wa, te te siwi wê'ô za'ra ô'umnhasite, we ĩsihutu norĩ hã. ¹³ Tawamhã Pedruhu ne dazadamnhasi te, te oto ĩsiré zudezu norĩ hã tiwi sisawi za'ra, zudezu'ô norĩ wi, Wanhib'apito zazei'wa oto wasiré 're wahâimana za'ra mono nherê. Banabéhé zama ma tô dazadamnhasi te, tiwi sisawi za'ra. ¹⁴ ãne na ma tô Pedru norĩ hã tinhimirosa'rata na upa za'ra, zudezu'ô norĩ ãma. Tô sena Cristuhu wasu'uwê zarina si oto dama 're hâimana za'ra mono ô di, Pedru norĩ hã. ãne wa tô ãma waihu'u za'ra. Taha wa, wa tô Pedruhu ma tinha, uburé Wanhib'apito zazei'wa norĩ nho'a, ãne: “A hã zudezu nherê, ma tô zudezu'ô norĩ siré 're asai mo aré, a hã zudezu'ô 're aihâimana mono newa. E niha ma tô bété oto tiwi asisawi za'ra, zudezu'ô norĩ wi, a'ã sizudezu za'ra da, ĩsazei'wa norĩ hã.” ãne wa tô tâma tinha.

¹⁵ Wa norĩ hã zudezu na wa tô wapoto ni. Zudezu'ô na wapoto ô di, siwa'ru 're ĩnomro mono norĩ ne. ¹⁶ Wa norĩ hã wa tô oto marĩ hã waihu'u ni, 'Re ĩhâimana u'âsi mono te te 're ĩda'awêsãmri mono zém na hã. Zezu Cristu, Danho'reptui'wa na da te dasina 're

umnhasi za'ra mono wamhã, 'Re ìhâimana u'âsi mono, dawasédé hã te te da'ãma 're ì'ab'madâ'â mono ò zéb zarina, te oto te te 're da'awēsãmri. Taha zarina, dawasété 'ru te, te te dahâ za'ra ò di za, rob'rãsutuzéb ãma hã. Ìsimiroti na Mozési te te ìrob'ui'ééré 'rata zarina, da te 're rob'manharĩ za'ra mono nherẽ, taha zarina te te dama 're aparĩ mono ò di za, dawasédé hã. Æne na wa tô oto waihu'u ni, wa norĩ hã. 17 Taha wa, Cristu Zezusi hã wa tô wasina umnhasi za'ra ni, taha zarina si wawasédé hã te te oto wa'ãma 're ab'madâ'â tõe mono da, tawapsi te te 're wa'awēsãmri mono da, 'Re ìhâimana u'âsi mono hã. Ìsimiroti na rob'ui'ééré zarina, da te 're rob'manharĩ za'ra mono nherẽ, taha zarina te te dama 're awaihu'u mono ò di za, dawasédé te te da'ãma 're ì'ab'madâ'â mono ò na. Taha wa, wa norĩ hã 'Re ìhâimana u'âsi mono nhimiroti 'rata na rob'ui'ééré zarina, wa te 're ìrob'manharĩ mono zém na wa te 're 'madâ'â mono ò di oto, taha zarina wawasédé hã te te wa'ãma 're ì'ab'madâ'â mono ò zéb zarina, te te 're wa'awēsãmri mono da, 'Re ìhâimana u'âsi mono hã. Wa norĩ hã Cristu, Danho'reptui'wa na wa tô wasina saze ni, taha zarina si wawasédé hã te te wa'ãma 're ab'madâ'â tõe mono da, tawapsi te te 're wawēsãmri mono da, 'Re ìhâimana u'âsi mono hã. Ìsimiroti na rob'ui'ééré 'rata zarina wa te 're ìrob'manharĩ mono zém na, wa te 're 'madâ'â mono ò di oto, taha zarina, te te wanho'reptu dai ò wa. Æne wa, ma tô ni'wam norĩ hã wama nharĩ za'ra, zudezu norĩ hã, wanhimirosa'rata na wa te ãma upa newa, aimawi na. E niha tawamhã. Cristu te te wama ìwaihu'uzéb zarina, wanhimirosa'rata na wa te ãma upai 'wa'ãhã, te aré Cristu hã wanhowa ãma upa na'rata, te te wama ìwaihu'uzém na hã. E tô sena, ma tô Cristu hã wanhowa ãma upa na'rata. Mare di. Te te ãma upai waihu'u ò di. Robaba uptabi di. 18 Wa hã wa oto te dama 're awaihu'u u'âsi, 'Re ìhâimana u'âsi mono nhimiroti 'rata na rob'ui'ééré zarina, da te 're rob'manharĩ za'ra mono nherẽ, taha zarina, 'Re ìhâimana u'âsi mono za te te 're ìda'anho'reptui mono ò na. Tawamhã nimahã na ìnhimirosa'rata na te saprĩ wamhã, wa za tô tãma ãma upa. Tawapsi ìwě'õre di za. 19-20 Æne te aré ìnhimirosa'rata 'rada hã ìma 're hâimana: 'Re ìhâimana u'âsi mono nhimiroti 'rata na rob'ui'ééré zarina te 're rob'manharĩ mono wamhã, taha zarina si ìwasédé hã te te ì'ãma 're 'madâ'â mono ò di za. Tawapsi te za oto te te 're ìwēsãmri. Taha zarina ìwasété 'ru te, rob'rãsutuzéb ãma te te ì'azârĩ ò di za, 'Re ìhâimana u'âsi mono hã. Æhãna ìnhimirosa'rata 'rada hã te oto ìza'u 're simi'wara. Ta hã wa tô oto rême pese ìsipara, 'Re ìhâimana u'âsi mono te te ìma ìwaihu'uzéb uwaibaba si 're ìmorĩ da. Zezu Cristu, wedepo'o nhonhi'rãmi na dâ'ã wa, ìsiré ìdâ'ãne, ìsi'uihã na te ìsima 're ìrosa'rata mono zém na 're ìhâimana mono ò di oto, Cristuhu si oto

ĩpě'ě 're, 're hâimana mono wa, 're ĩwada'uri wě mono 'wa da hã. Cristu hã, 'Re ĩhâimana u'âsi mono 'ra. Ta hã te te 're ĩzawi pese mono wa, ma tô ĩzada sisõ, ĩzada dâ'â da. Taha wa, 'Re ĩhâimana u'âsi mono 'ra umnhasi sina, wa oto 're ĩhâimana. ²¹ Wa hã te ĩsiwi 're wě'õ mono õ di oto, 'Re ĩhâimana u'âsi mono te te 're ĩzawi pese mono zé hã, Cristu te te ĩwa'âbâzém na dazada ĩdâ'âzém na hã. Taha wa, ĩsi'uihâ na ĩsisõ'reptu dai õ wa, 'Re ĩhâimana u'âsi mono nhimiroti 'rata na rob'ui'ééré zarina te 're ĩrob'manharĩ mono zém na, te 're ab'madâ'â mono õ di oto, taha zarina, ĩwasédé hã te te ĩãma 're ab'madâ'â tõ mono da, te te 're ĩwěsãmri mono da oto, 'Re ĩhâimana u'âsi mono hã. Dasi'uihâ na dasisõ'reptu dai õ wa, 'Re ĩhâimana u'âsi mono nhimiroti 'rata na rob'ui'ééré zarina, da te 're rob'manharĩ za'ra mono nherě, taha zarina te te dama 're apari mono õ di dawasédé hã, da te 're ĩmanharĩ za'ra mono zé hã. Ane 'wa'âhã, aré marĩ dai õ di, Zezu Cristu dazada ĩdâ'âzé hã. Taha wa, te oto ĩsiwi 're wě'õ mono õ di, 'Re ĩhâimana u'âsi mono te te 're ĩzawi pese mono zé hã, Cristu te te ĩwa'âbâzém na, dazada ĩdâ'âzém na hã. Mare uptabi di. Ane Pedruhu ma, te ĩrowaihu'uzé hã.

**'Re ĩhâimana u'âsi mono te te 're ĩda'awěsãmri
mono zém na rowasu'u**

3 ¹ Darasiza nhihudu norĩ, e niha te rosa'rata waihu'u ãna 're anomro aba mo. Zezu Cristu hã wedepo'o nhonhi'rãmi na wazada ĩdâ'âzém na, wa tô te aima ãma 're rowasu'u pese za'ra wa'wa aré. E 'wa hã ma tô aiwi udâ za'ra wa'wa, taré waihu'u zawã za'ra wa'aba da. ² Ma'ãpé we ĩma waihu'u za'ra wa'aba. E marĩ wa, ma tô 'Re ĩhâimana u'âsi mono hã Tipě'ězani hã we aima sãmri za'ra wa'wa, aipě'ě 're. E ĩsimiroti 'rata na rob'ui'ééré zarina, 're ĩrob'manharĩ za'ra wa'aba mono zéb zarina, ma tô we Tipě'ězani hã aima sãmri za'ra wa'wa. Mare di. E Zezu Cristuhu wasu'uwě hã aipo're na wapari za'ra wa'aba pari, tô sena ĩwasu'uwě na asina 're saze za'ra wa'aba mono wa, ma tô we aima sãmri za'ra wa'wa. Taha wa, ma tô we Tipě'ězani hã aima sãmri za'ra wa'wa tô, aipě'ě 're, 're sãmra za'ra wa'aba mono da oto. ³ E niha bété rosa'rata waihu'u ãna, te oto 're anomro aba mo. 'Re ĩhâimana u'âsi mono, Tipě'ězani te te aima ĩsãmri za'ra wa'aba zarina, ma tô aihâimanazép tém na ãma ĩsãna'rata za'ra wa'wa, ĩwě na. E niha te bété oto 'rãwi 're asi'madâ'â za'ra wa'aba mo asi'uihâ na, asina uwaimrami za'ra wa'aba da newa, asisõ'reptu za'ra wa'aba zé hã. ⁴⁻⁵ E taré ma tô ĩwě hã asina 're ĩwaihu'u za'ra wa'aba mo, marĩ hã ãma waihu'u za'ra wa'aba ãna. 'Re ĩhâimana u'âsi mono si, ma tô we Tipě'ězani hã aipě'ě 're aima sãmri za'ra wa'wa. Ma tô duré marĩ dama ĩmanharĩ waihu'u'õ hã te te aima 're 'manharĩ wě za'ra wa'wa, tiwaihu'u pese

na. E marĩ wa. E ĩsimiroti na rob'ui'ére 'rata zarina 're rob'manharĩ za'ra wa'aba mono wa. Mare di. Taha zarinaĩ õ di. Zezu Cristuhu wasu'uwẽ hã aipo're na wapari za'ra wa'aba pari, Cristu Danho'reptui'wa na asina 're umnhasi za'ra wa'aba mono wa, ma tô we Tipẽ'ẽzani hã aima sãmri za'ra wa'wa, 'Re ĩhâimana u'âsi mono hã. Taha zarina si, ma tô duré marĩ dama ĩ'manharĩ waihu'u'õ hã te te aima 're 'manharĩ wẽ za'ra wa'wa, tiwaihu'u pese na.

⁶Tane Abra'ã hã. Ta hã ma tô 'Re ĩhâimana u'âsi mono hã te te sina 're umnhasi pese, te te tãma ĩropisutuzé za te te tãma ãma ĩ'uwaimrami na hã. Taha wa, 'Re ĩhâimana u'âsi mono hã ma tô te te 're wẽsãmri, Abra'ã hã. Duréihã ãne Abra'ãhã wasu'u na ma tô rob'ui'ére ĩbaihã na, 'Re ĩhâimana u'âsi mono zadawa wasu'u'wa hã. ⁷Tawamhã Cristu Danho'reptui'wa na, da te dasina 're umnhasi za'ra mono wamhã, simisutu Abra'ãhã nhihuđu na, te za oto te te 're da'anhsi, 'Re ĩhâimana u'âsi mono hã. ãne hã wa tô aima waihu'u za'ra wa'wa, waihu'u za'ra wa'aba da asina. ⁸Zahadu romhã uptabi nherẽ, ma tô zudezu'õ norĩ ãma sima roti, 'Re ĩhâimana u'âsi mono hã. ãne ĩsimiroti hã: Zudezu'õ norĩ hã, Cristu Danho'reptui'wa na te te sina 're umnhasi za'ra mono wamhã, ta norĩ ma zama te za duré tãma 're ĩrowẽ za'ra mono zéb da hã te te tãma 're apisutu, 'Re ĩhâimana u'âsi mono hã. ĩwasédé hã te te oto ãma 're ĩ'ab'madãã mono õ zéb zarina, te za te te 're awẽsãmri. Taha zarina dawasété 'ru te, te te ahã za'ra õ di za, rob'rãsutuzéb ãma hã. ãne ĩsimiroti hã zudezu'õ norĩ ãma hã. Taha wa, ma tô ãne Abra'ãhã ma waihu'u siro, 'Re ĩhâimana u'âsi mono hã: “Aima te ĩropisutuzém na asina ĩzazei pese zéb zarina, wa za dama 're ĩrowẽ za'ra mono zéb da hã te dama 're apisutu, daro mono bã.” ãne ma tô ĩwasu'uwẽ na romhã ré ãma po're pu'u siro. ⁹Abra'ã hã ma tô 'Re ĩhâimana u'âsi mono hã te te sina 're sazei pese, te te tãma ĩropisutuzém na. Taha wa, rowẽ te te tãma ĩpisutuzéb zarina, ma tô rowẽ uptabi na 're hâimana. Tane duré Cristu Danho'reptui'wa na, da te dasina 're saze za'ra mono wamhã, Abra'ãhã ma te te ĩpisutu ne, te za dama 're ĩrowẽ za'ra mono zéb da hã te te dama 're apisutu, 'Re ĩhâimana u'âsi mono hã.

¹⁰Tane nherẽ, ĩsimiroti na rob'ui'ére 'rata zarina, da te 're ĩrob'manharĩ za'ra mono zém na 're danhopré mono wamhã, taha zarina, 'Re ĩhâimana u'âsi mono te te 're da'anho'reptui mono da newa, e niha te za tawamhã dama 're romhâimana za'ra. Õne haré, ĩsimiroti mono bã da te dasina tãma ãma 're uwaimrami za'ra mono õ wa, te za tô te te siwi 're da'awẽ'õ, 'Re ĩhâimana u'âsi mono hã. Duréihã ma tô ãne na rob'ui'ére ni:

“Re ĩhâimana u'âsi mono nhimiroti mono bã, taha na rob'ui'ére hã te ĩbaihã na dama 're hâimana, da te dasina tãma ãma 're uwaimrami za'ra mono da. ãne zarina,

ĩsimiroti mono bâ, da te dasina tãma ãma 're uwaimrami za'ra mono õ wamhã, te za te te siwi 're da'awẽ'õ, 'Re ìhâimana u'âsi mono hã.”

Ãne ma tô ãhã wasu'u na rob'ui'ééré, ìsadawa wasu'u'wa hã. 11 E ãne te za te te dama 're awaihu'u, 'Re ìhâimana u'âsi mono hã: “Ìnhimiroti na rob'ui'ééré 'rata zarina, 're ìrob'manharĩ za'ra wa'aba mono zéb zarina, te ai'ãma 're ab'madâ'ã aba mono õ di za oto, aiwasété 'wa hã. Wa za oto te 're ai'awẽsãmri 'wa. Taha zarina, aiwasété 'ru te, te aihã za'ra wa'aba õ di za.” E ãne te za te te dama 're awaihu'u. Mare di. Duréihã ma tô ãne na rob'ui'ééré ni:

“Re ìhâimana u'âsi mono, Danho'reptui'wa na da te dasina 're ì'umnhasi za'ra mono zéb zarina si, dawasédé hã te te da'ãma 're ab'madâ'ã mono õ di za. ãne wamhã, te za rowẽ uptabi na 're dahâimana u'âsi za'ra.”

Ãne na da te ãma rob'ui'ééré wa, wa tô waihu'u za'ra ni tô. 12 Duréihã ma tô duré ãne na rob'ui'ééré ni:

“Re ìhâimana u'âsi mono nhimiroti mono bâ, da te dasina tãma ãma 're uwaimrami u'âsi za'ra mono wamhã, rowẽ uptabi na te za 're dahâimana u'âsi za'ra.”

Ãne ìwasu'u na rob'ui'ééré hã. Tane nherẽ, Cristuhu wasu'u zô, te zahadu 're rob'éé, Cristu Danho'reptui'wa na da te dasina 're umnhasi za'ra mono da, dama 're ìrowẽ za'ra mono zéb da hã.

13 Wa norĩ hã wa te dame wasina tãma ãma 're uwaimrami za'ra mono õ di, 'Re ìhâimana u'âsi mono nhimiroti mono bâ. Taha wa, te aré siwi wa'awẽ'õ, 'Re ìhâimana u'âsi mono hã. Tawapsi wawasété 'ru te, te aré wahã za'ra. Tane nherẽ, te te 're wahã za'ra mono tô da, ma tô Cristu hã wẽ nherẽ, wazada sisõ, wa'upana 'Re ìhâimana u'âsi mono te te azãri da. Taha na ma tô wa'awa'ã, Cristu hã. Duréihã ma tô ãne na ãma rob'ui'ééré ni:

“Ni'wa hã wasété uptabi wa, te za dasiwi wĩrĩ ni. Taha pari, wede na te za dasiwi sasõmri ni, da te ãma waihu'u za'ra da, wasété uptabi wa, 'Re ìhâimana u'âsi mono ma ìwẽ õ na.”

Ãne ìwasu'u na rob'ui'ééré hã. Tawamhã ãma ìrob'ui'éérézéb zarina, Cristu hã wẽ nherẽ, wedepo'o nnonhi'rãmi na sa'o ré, ma tô siwi wẽ'õ, 'Re ìhâimana u'âsi mono hã.



Darasiza 3.13

Wa'upana ma tô azâ, wasété õ nherê. **14** ãne ma tô Cristu Zezusi hã wa'awa'âbâ pa. E marĩ da. Simisutu ãsib'a'uwẽ oto 're wanomro mono wa, zudezu'õ norĩ ma zama, ãwẽ na 'Re ãhãimana u'ãsi mono te te tãma ãma 're a'uwaimrami mono da, Abra'ãhã ma te te ãropisutuzéb zarina, duré wahãiba mono bâ wapê'ẽ 're, Tipê'ẽzani hã te te wama 're anhomri mono da, te te wama ãropisutu za'ra zéb zarina, Zezu Cristu hã Danho'reptui'wa na, wa te wasina 're umnhasi za'ra mono wa.

**'Re ãhãimana u'ãsi mono nhimiroti 'rata na rowasu'u,
Abra'ãhã ma ãwẽ na te te tãma ãropisutuzém na rowasu'u me**

15 ãsisãnawã norĩ, ãne wa za oto aima ãma romnhimire'é za'ra wa'wa, 're ãwahãimana za'ra mono zém na. Até ni'wam norĩ hã te za marĩ ãwẽ na sima roti zahuré. Tawamhã tô sena za te te sima ãma ã'uwaimrami zahuré pibu ma, te za danho'a rob'ui'ére zahuré tinhisi na, da te ãma waihu'u zahuré da. Taha parimhã, te te sima ãma uwaimrami zahuré tã da, ni'wa hã te te tiwi ãsizãri zahuré da hã, mare di. Duré, ni'wa hã tinhimiroti na te te ãma 'rãnhipa zahuré õ di za. Ma tô ãma sisazei pari zahuré. **16** Tane Abra'ãhã ma, ãsipai u ãsihudu na zama, 'Re ãhãimana u'ãsi mono te te ãropisutuzé hã. ãhã wasu'u na, da te ãma rob'ui'ére wamhã, ãsihudu norĩ hã da te wasu'u za'ra õ di. ãsihudu norĩ hã da te wasu'u za'ra 'wa'ãhã, te aré ãsihudu ahã na wasu'u ni. ãsihudu misi, te wasu'u. Ta hã Cristu. **17** Wa za oto aima rowasu'u pese za'ra wa'wa, te aima ãma ãsimire'é aba zém na. 'Re ãhãimana u'ãsi mono hã ma tô Abra'ãhã ma ãwẽ na ropisutu. Tô sena te te tãma ãma uwaimrami da, ma tô tãma siwasu'u. Taha pari, te te tãma ãropisutuzém na hã ma tô da'ãma tiwahub ahã uptabi, 430 na. Tawamhã ma tô tinhimiroti mono bâ dama waihu'u 'rata. E taha wa, ãwẽ na te te dama ãma uwaimrami õ di za, Abra'ãhã ma, te te ãropisutuzém na hã. E taha wa, te za tinhimiropisutu na ãma saprĩ, te te dama ãma uwaimrami tã da. Mare di. Te za tô te te dama ãma 're a'uwaimrami u'ãsi, Abra'ãhã ma, te te ãropisutuzéb zarina. **18** Abra'ãhã ma, ãwẽ na te te tãma ropisutu wa, taha zarina ma tô ãma tãma uwaimra. Tane ãwẽ na te te dama ropisutu wa, taha zarina si, te za tô te te ãma dama 're a'uwaimrami, sô 're simipari mono ãna, marĩ na ãsimiroti hã a'ã da te dasina tãma ãma 're ã'uwaimrami za'ra mono zéb zô.

19 Abra'ã hã 're hãimana mono ré, ma tô ãwẽ na tãma ropisutu siro 'Re ãhãimana u'ãsi mono hã, ãsipai u ãsihudu ma, te te tãma ãma 're a'uwaimrami mono da. Abra'ãhã za'u si, ma tô oto tinhimiroti mono bâ dama waihu'u, 'Re ãhãimana u'ãsi mono hã. E marĩ da. Dawasété na 're danomro mono wa, 'Re ãhãimana u'ãsi mono ma, dawasété na 'rãwi 're dasiwaihu'u za'ra mono da. Taha da, ma tô tinhimiroti hã dama waihu'u. Abra'ãhã nhihudu, ti'ai u we ãmorizéb

u si, te za pire na 're hâimana, 'Re îhâimana u'âsi mono nhimiroti zarina, zudezu norĩ te te 're îrob'manharĩ za'ra mono zéb da hã. 'Re îhâimana u'âsi mono hã tinhimiroti hã te te dama 're awaihu'u mono da, ma tô tinhimiroti na rob'ui'ééré hã hâiwa âma tâma îromhuri'wa norĩ ma tisõ, aibâ ma te te siwi sômri da, îsipai u. ²⁰ Ni'wa hã ti'ai âma si'uihâ na tinhimiroti hã te te dama waihu'u wamhã, ni'wa hã îsâna'remhã hâimana ô di, îsimiroti hã te te dama îwaihu'u da hã. Tane 'Re îhâimana u'âsi mono hã. Si'uihâ na ma tô Abra'âhã ma waihu'u, îwê na za te te tâma âma 're î'a'uwaimrami mono na hã.

**'Re îhâimana u'âsi mono nhimiroti 'rata na,
Mozési te te âma îrob'ui'éérézê wasu'u**

²¹ Abra'âhã za'u si, ma tô oto tinhimiroti mono bâ dama waihu'u, 'Re îhâimana u'âsi mono hã. E taha wa, te te dama âma uwaimrami ô di za îwê na, Abra'âhã ma, aré te te îropisutuzéb zarina. Mare di. Te za tô te te dama âma 're a'uwaimrami u'âsi. Uburé marĩ hã îsimiroti zarina, da te dasina tâma âma 're î'uwaimrami za'ra mono da hã, dama waihu'u za'ra 'wa'âhã, 'Re îhâimana u'âsi mono te aré te te dama 're apisutu, rowê uptabi na 're dahâimana za'ra mono da. ²² Tane nherê, daro mono bâ te dawasété na 're danomro. Dasi'uihâ na dawasété wi 're dasipizari waihu'u za'ra mono ô di tô. Âne, da te îwaihu'u za'ra zéb da hã, ma tô 'Re îhâimana u'âsi mono zadawa wasu'u'wa hã âma rob'ui'ééré. E marĩ da. Zezu Cristu Danho'reptui'wa na, da te dasina 're umnhasi za'ra mono da, tawapsi 'Re îhâimana u'âsi mono îwê hã te te dama âma 're uwaimrami mono da, te te dama îropisutuzéb zarina.

²³ Bâdâ îwa waptãã ô ré, Zezu Cristu Danho'reptui'wa na da te dasina 're umnhasi za'ra mono ô ré hã, âne aré dahâimanazé hã. 'Re îhâimana u'âsi mono hã ma tô zudezu norĩ hã tinhimiroti 'rata na te te 're a'uwati, Cristuhu wasu'uwê hã sô'awi te te wama waihu'u za'ra ô ré hã, Cristu Danho'reptui'wa na wa te wasina 're î'umnhasi za'ra mono zéb da hã oto. ²⁴ 'Re daprédub za'ra mono ô ré, da'madâ'â'wa hã te te dama 're îroti mono ne, ma tô 'Re îhâimana u'âsi mono hã tinhimiroti 'rata na te te 're wa'a'uwati aré, Cristu hã datême wei morĩ ô ré. Ta hã te we oto datême mo, te te dawa'âbâ da, Danho'reptui'wa na wa te wasina 're îsaze za'ra mono zéb zarina, wawasédé hã te te wa'âma 're ab'madâ'â tō mono da oto, 'Re îhâimana u'âsi mono hã, taha zarina te te 're wa'awêsâmri mono da oto.

²⁵⁻²⁶ Ma tô oto bâdâ hã îwa waptãã, Cristu hã wa te wasina 're î'umnhasi za'ra mono zéb da hã. Taha wa, 'Re îhâimana u'âsi mono nhimiroti 'rata na rob'ui'ééré zarina, wa te 're îrob'manharĩ za'ra mono zéb da hã, pire na wama 're hâimana za'ra mono ô di oto, Mozési te te âma îrob'ui'ééré hã. E marĩ wa. A norĩ wa'wa hã ma tô

Cristu Zezusi hã Danho'reptui'wa na asina 're ãsaze za'ra wa'aba mo. Taha wa, te oto simisutu 'Re ãhãimana u'ãsi mono 'ra, 're anomro aba mo, aihĩni. **27** Ma tã duré â dawabzuri hã ãmanharĩ za'ra wa'wa, Cristu 're ãmorĩzém na si oto ãma 're anomro wẽ wa'aba mono da, simisutu Cristuhu nhib'a'uwẽ 're anomro aba mono wa. **28-29** Taha zarina, 'Re ãhãimana u'ãsi mono hã te te siwi 're da'aba'a waihu'u mono õ di, zudezu norĩ hã, duré zudezu'õ norĩ hã, ãwada'uri zarina si, pawa'ãbã ãna dama romhuri'wa norĩ hã, duré wada'uri ãna si'uihã na 're ãhãimana za'ra mono norĩ hã, aibã norĩ hã, duré pi'õ norĩ hã. Simisutu Cristu Zezusihi nhib'a'uwẽ si, te 're aihãimana za'ra wa'aba mo. Taha wa, te oto Abra'ãhã nhihudu na te te 're asisi za'ra wa'wa, 'Re ãhãimana u'ãsi mono hã. ãhã wa, ãwẽ na si, Abra'ãhã ma te te ãropisutuzéb zarina, te za ãwẽ na si te te aima ãma 're a'uwaimrami 'wa, Aimagama 'wa hã.

4 ¹⁻² ãne wa za duré marĩ hã aima waihu'u za'ra wa'wa, romnhimiré na ãwaihu'u za'ra wa'aba zéb da hã. ãté ai'uté mama tã hã te 're 'maihãimana, 'watébrémi hã. Prédu wapsi, ãte hã za, ãmama hã dã'ã õ ré, tinhibrom na te te tãma ãma ãropisutuzé hã. Tane nherẽ, uburé timama nhibro ré, za 're hãimana mono nherẽ, prédu õ ré te za danhimarĩ ãna te te dama 're ãromhuri za'ra mono norĩ ne, 're hãimana. Te za a'ã da te dasiwi 're 'madã'ã, hãimana wẽ na 're hãimana mono zõ. ãmama nhibro hã te za duré da te tãma 're 'madã'ã pese, 'watébrémi ma. ãne te za a'ã ãra hã 're hãimana, ãma ãwahubzé hã bãdã hã ãwa waptã'ã õ ré, ãmama tinhibrom na te te tãma ãropisutuzé hã. **3** Tane wa norĩ hã, ai'uté ne, roti tã sena wama ãwaihu'u pese za'ra õ zarina, wa tã aré 're wahãimana za'ra, roti da te wama 're ãwaihu'u 'rata za'ra mono zéb zarina. **4** Tawamhã bãdã hã ma tã ãwa waptãrã oto, 'Re ãhãimana u'ãsi mono hã ti'ra ãma te te ãrotizéb zarina, ti'ai u we te te ãsatõrĩ da hã. We te te satõrĩ wamhã, ma tã pi'õi ma ãra hã podo oto, zudezu na. Zudezu na poto wa, pire na ma tã tãma 're hãimana, 'Re ãhãimana u'ãsi mono nhimiroti hã, Mozésihi ma te te 're ãawaihu'u mono hã. **5** E marĩ da, ma tã ti'ra hã we satõ, 'Re ãhãimana u'ãsi mono hã. Wanho'reptuzé hã wa te wasina 're uwaimrami za'ra mono da, ãsimiroti na rob'ui'ére 'rata zarina, wa te 're ãrob'manharĩ za'ra mono na 're ãwanhopré za'ra mono norĩ hã te te wa'awa'ãbã da, ma tã we satõ, wa'ãma 're 'ra za'ra mono da oto, 'Re ãhãimana u'ãsi mono hã.

6 Tawamhã ãra oto 're ãwanomro mono na 'rãwi 're wasiwaihu'u za'ra mono da, ma tã we ti'ra pẽ'ezani hã te te wama 're anhomri, wapẽ'ẽ mono bã wama 're hãimana za'ra mono da, 'Re ãhãimana u'ãsi mono hã Wamama na, wa te 're sisi za'ra mono da oto. **7** Taha wa, robzei'õ na danhimiwada'uri zarina si, dapawa'ãbã ãna 're ãhãimana za'ra mono norĩ ne, 're aihãimana za'ra wa'aba mono õ di

oto. 'Re ìhâimana u'âsi mono 'ra si, te oto 're anomro aba mo. ãne wa, uburé marĩ wẽ na ti'ra norĩ ma, te te ìropisutuzéb zarina, te za tô te te aima ãma 're a'uwaimrami 'wa, Aimama 'wa hã.

8 Zudezu'õ norĩ, aima sa'rese za'ra wa'aba õ di aré, 'Re ìhâimana u'âsi mono hã. Taha wa, ma tô ì'upana aimawi nhimiwada'uri na 're aihâimana za'ra wa'aba mo danhimiwada'uri zarina si, pawa'âbâ ãna 're ìhâimana za'ra mono norĩ ne, robzei'õ na. **9** 'Re ìhâimana u'âsi mono hã ma tô oto Aimama na asiwi ìwaihu'u za'ra wa'wa. Taha wa, aima 're rowẽ za'ra wa'aba mono di oto. Taha nhipai u, ti'ra na te te oto sina ai'awaihu'u aba wa, aima 're rowẽ uptabi za'ra wa'aba mono di. ãne wamhã, e niha te za bété apâ aipizari za'ra wa'wa, asimizazezéb 'rata u, taha zarina asina uwaimrami za'ra wa'aba õ nherẽ, asõ'reptu za'ra wa'aba zé hã, duré taha zarina rowẽ si aima 're hâimana za'ra wa'aba mono õ nherẽ. E niha te za bété asima ìwẽ za'ra wa'wa, danhimiwada'uri zarina si pawa'âbâ ãna 're ìhâimana za'ra mono norĩ ne, apâ 're aihâimana za'ra wa'aba mono da, robzei'õ na. **10** Bâdâ ìpire hã marĩ 'manharizéb da hã, te oto zudezu norĩ zarina 're ìmadââ za'ra wa'aba mo, a'amo zama, wahub zama. **11** ãne wa, wa ai'ãma 're ìhâtââ za'ra wa'wa. E marĩ wa. Wanhib'apito wasu'uwẽ na 're ìsiwasutu wẽ mono nherẽ, te 're aipawaptob za'ra wa'aba mono zé hã, e taré te za 're hâimana.

12 ìsisânawã norĩ, wa hã zudezu nherẽ, ai'rata ìnhamra aba ré, wa tô zudezu'õ newa asine 're ìmorĩ 'wa. Taha wa, ma'âpé ìsine 're anomro aba mono. Atẽme amo ìmorĩ 'rata aba wamhã, marĩ hã ìma 'manharĩ wasété za'ra wa'aba õ di, ìhâiba na hã. **13** ìhâzé si ì'ãma watobro wa, wa tô ai'rata ìnhamra za'ra wa'wa. ãhã wa, wa tô Zezu Cristuhu wasu'uwẽ na aima rowasu'u na'rata za'ra wa'wa. ãne na ma tô ì'ãma ìwaihu'u za'ra wa'wa aré. **14** Tawamhã ìhâzé ré, atẽme ìwisi za'ra wa'aba nherẽ, ìhâzé wa, asiwi ìwẽ'õ za'ra wa'aba õ di. Mare di. Hâiwa ãma 'Re ìhâimana u'âsi mono ma romhuri'wa, wẽ na asiwi ì'âri aba ne, niha wamhã, Cristu Zezusi, wẽ na asiwi ì'âri aba ne, ma tô wẽ na asiwi ì'âri 'wa. **15** E niha bété oto ãhãna hã. Aré aima 're rowẽ za'ra wa'aba mono di, ai'rata ìnhamra aba wa. ãhã wa, aima waihu'u pese za'ra wa'aba wa'âhã, te aré ato hã ìsani za'ra wa'wa, ìma sômri za'ra wa'aba da, ato hã. **16** E niha te bété oto ãhãna hã ì'ãma ìrosa'rata za'ra wa'wa. E aiwẽ'õ wa'aba 'wa na si, te za oto ì'ãma ìrosa'rata za'ra wa'wa, rowasu'u tô sena na si te aima 're rowasu'u za'ra wa'aba mono nherẽ.

17 Aibã norĩ, aimawi rowasu'u'wa norĩ hã te sima aiwẽ za'ra wa'wa, ta norĩ nhimirowasu'u si asima 're wẽ za'ra wa'aba mono da, tô sena tinhimirowasu'u wẽ na te te 're aipawaptob za'ra wa'aba mono da newa. E marĩ da. ìnhimirowasu'u nhiti, asina 're aipahã za'ra wa'aba mono da ìtẽme, ìnhimiroti nhipai u, õ norĩ nhimiroti si

asima 're wẽ uptabi za'ra wa'aba mono da oto. **18** Roti ïwẽ na si, da te 're aipawaptob za'ra wa'aba mono da, da te dasima 're aiwẽ za'ra wa'aba mono wamhã, ïma wẽ di tô, ai'rata ïnhamra aba ré, duré ïhâiba za're'ra zama. **19** ï'ra norĩ, ïma asawi pese za'ra wa'aba norĩ hã, pi'õ tiwasã te te 're ïsépata za'ra mono ne, wa tô wa hã ïpẽ hã te ai'ãma 're sépata za'ra wa'wa, Zezu Cristu 're ïmorĩzém na 're anomro aba mono õ wa. ãma 're anomro wẽ wa'aba mono wapsi, ïma rowẽ di za. **20** ãhãna ai'ãma ïhâtââ za'ra wa'aba di. ãhã wa, ïnhimirosa'rada hã ahã di, ai'ãma za'ra wa'aba hã. Ai'rata ïhâimana za'ra wa'aba neza, ïwaimri te oto aima rowaihu'u za'ra wa'aba da.

Sara norĩ wasu'u hã, Adaha wasu'u me

21 Uburé õ nherẽ, ma tô asima ïwẽ za'ra wa'wa, 'Re ïhâimana u'âsi mono nhimiroti 'rata na rob'ui'ééré zarina, 're rob'manhaĩ za'ra wa'aba mono da, taha zarina si 'Re ïhâimana u'âsi mono hã te te 're asõ'reptu za'ra wa'aba mono da newa. E aima waihu'u za'ra wa'aba õ di, 'Re ïhâimana u'âsi mono wasu'uwẽ hã, Abra'ãhã 'ra norĩ ãma hã. **22** ãne ta norĩ wasu'u na, rob'ui'ééré hã: Abra'ãhã 'ra norĩ hã, maparane aibã hã. ïmorĩ'rada hã Adaha 'ra, ïwada'uri zarina si pawa'ãbã ãna 're ïhâimana mono 'ra. Duré ïhâiba amo hã Saraha 'ra hã wada'uri ãna 're ïhâimana mono 'ra, te 're hâimana. **23** Dasi'uihã na dahâimanazém na 're ïda'ra za'ra mono na ma ï'ra hã tãma podó, romhuri'wai ma. Abra'ãhã 'ra hãiba amo hã 'Re ïhâimana u'âsi mono te te tãma ïropisutuzéb zarina, ma ï'ra hã tãma podó, wada'uri ãna 're ïhâimana mono ma hã, Saraha ma. ãne Abra'ãhã 'ra norĩ wasu'u hã. **24** Marĩ te te ïwasu'uzé hã, te pi'õ norĩ hã wasu'u zahuré. 'Re ïhâimana u'âsi mono te te sima da'ãma ïrotizé hã te pi'õ norĩ wasu'u zahuré. Maparane te te sima da'ãma ïrotizé hã. ïmorĩ'rada hã Sina'i na êtẽ rãihã nhisi ãma, 'Re ïhâimana u'âsi mono te te sima da'ãma ïrotizé. Ta hã, Ada te wasu'u. Adaha 'ra hã ma tô tina zabãdã danhimiwada'uri zarina 're hâimana, robzei'õ na. Tane Sina'i ãma 'Re ïhâimana u'âsi mono, te te sima da'ãma ïrotizém niw'ĩ re ïdanomro mono norĩ hã, Adaha 'ra ne, danhimiwada'uri zarina pawa'ãbã ãna 're ïdahâimana za'ra mono ne, te robzei'õ na 're dahâimana za'ra, ãhãna hã. **25** Arabiza na daza'ru nhisi ãma, Sina'i na êtẽ rãihã nhisi hã, Ada te wasu'u. Zeruzarẽ na 'ri nho'õmo nhisi, Ada te duré wasu'u. E marĩ wa. Zeruzarẽ 're, 're ïdahâimana za'ra mono norĩ hã danhimiwada'uri zarina, dapawa'ãbã ãna 're ïdahâimana za'ra mono norĩ ne, te robzei'õ na 're dahâimana za'ra. **26** ãnei õ di, Zeruzarẽ ïhâiba amo hã, hãiwa ãma 're ïsa mono hã. Rowẽ na si, te ïwa 're dahâimana za'ra. Zeruzarẽ hã hãiwa ãma 're ïsa mono hã, wana Sara hã te wasu'u. **27** Duréihã, ma tô pi'õ ï'ra õ na ãma romnhimire'é 'Re ïhâimana u'âsi mono hã, Zeruzarẽ 're, 're ïhâimana za'ra mono norĩ ãma. ãne te 'mahã:

“Pi'õ, ai'ra hã niwa aima 'maipoto õ nherẽ, ma'ãpé 're atoi u'âsi mono, aipẽ'ẽ 're. Aimro hã te te airẽme nherẽ, ai'ra ahâ di za. Pi'õ timro ré, 're ãsãra mono zém nhipai u, ai'ra ahâ di za. Taha wa, te za rowẽ te, 're atoi u'âsi mo.”

Ãne te 'Re ãhãimana u'âsi mono hã 'ri nho'u hã 'mahã.

28 ãsisãnawã norĩ, ãhã wasu'u zarina, te oto Abra'ãhã nhihudu na te te 're asisi za'ra wa'wa, 'Re ãhãimana u'âsi mono hã. Izati hã ma tô podo, 'Re ãhãimana u'âsi mono hã Abra'ãhã ma, te te ãropisutuzéb zarina. Tane te te tãma ãropisutuzéb zarina, te oto Abra'ãhã nhihudu na te te 're asisi za'ra wa'wa, 'Re ãhãimana u'âsi mono hã. 29 Abra'ã hã 're morĩ ré, ma tô Izatihi ma nharĩ wasété, dasi'uihã na dahãimanazém na 're ãda'ra za'ra mono na ãpodo hã. 'Re ãhãimana u'âsi mono pẽ'ẽzani, te te ãpawaptobzém na ãpoto ma, ma tô nharĩ wasété. Tane duré ãhãna hã te za 're romhãimana. 30 E niha tawamhã duréi wasu'u na rob'ui'ére hã. Ãne ãwasu'u hã:

“Ãra ré satõrĩ, pi'õ hã romhuri'wa hã. ãmama, tinhibrom na tãma ãma sipo'o zahuré õ di za, danhimiwada'uri zarina 're ãhãimana mono õ 'ra me.”

Ãne ãwasu'u na rob'ui'ére hã. 31 ãhã wa, ãsisãnawã norĩ, wa za oto marĩ hã ãwasu'u na waihu'u za'ra ni. 'Re ãhãimana u'âsi mono hã Adaha nhihudu na te te 're wa'anhisi mono õ di za oto, danhimiwada'uri zarina 're ãmorĩ nhihudu, 're ãwahãimana za'ra mono na hã. Mare di. Danhimiwada'uri zarina 're ãhãimana mono õ nhihudu, 're ãwahãimana za'ra mono na, te oto te te 're wa'anhisi, 'Re ãhãimana u'âsi mono hã, Saraha nhihudu uptabi na. Taha wa, wa norĩ hã wama 're rowẽ uptabi za'ra mono di oto.

Wanhib'apito ãma rowẽ na 're ãdahãimana za'ra mono zém na rowasu'u

5 1 Zezu Cristu hã ma tô wa'anho'reptui pa, rowẽ na ãma 're wahãimana za'ra mono da. Taha wa, 'Re ãhãimana u'âsi mono nhimiroti 'rata na rob'ui'ére zarina, wa te 're ãrob'manharĩ za'ra mono zém na, 're wanhopré mono õ di za oto, taha zarina te te 're wa'anho'reptui mono õ wa. Ãne wamhã, tô senai'õ na rowasu'u'wa norĩ wi 're asiptete za'ra wa'aba mono za, ãsimiroti na 're aihãimana za'ra wa'aba mono wa, apã robzei'õ na 're anomro aba mono tã da.

2 Ma'ãpé asina ãwapari pese za'ra wa'aba za. Wa hã Paru, marĩ hã wa za aima waihu'u za'ra wa'wa. Da te 're asihãiwata nhihãri za'ra wa'aba mono da, asizudezu za'ra wa'aba da, asina dazaze za'ra wa'aba wamhã, taha zarina 'Re ãhãimana u'âsi mono te te 're asõ'reptu za'ra wa'aba mono da newa, e niha za tawamhã. Cristu hã wazada dãã nherẽ, te te 're wa'anho'reptui mono da, taré te za 're sa'wari, asada ãdãã za'ra wa'aba zé hã. 3 Wa za duré aima ãma sahu za'ra wa'wa,

te aima ĩwaihu'u za'ra wa'aba zém na hã. Ni'wam norĩ hã da te sihãiwata nhihãri za'ra da, te te sina dazaze za'ra wamhã, taha zarina 'Re ĩhãimana u'ãsi mono hã te te 're sõ'reptu za'ra mono da newa, e niha te za tawamhã 're hãimana za'ra, ta norĩ hã. Danhãiwata nhihãri siré, te za õne haré 'Re ĩhãimana u'ãsi mono nhimiroti mono bâ te te sina tãma ãma 're uwaimrami za'ra, 'Re ĩhãimana u'ãsi mono te te siwi 're awẽ'õ tõ mono da. ⁴ Zudezu norĩ ne, ma tô 'rãwi 're asi'mai'madã'ã aba mo, 'Re ĩhãimana u'ãsi mono nhimiroti 'rata na rob'ui'ére zarina 're rob'manharĩ za'ra wa'aba mono da, taha zarina, 'Re ĩhãimana u'ãsi mono, aiwasédé hã te te ai'ãma 're ab'madã'ã aba mono õ wa, te te 're aiwẽsãmri za'ra wa'aba mono da oto, taha zarina aiwasété 'ru te, te te aihã za'ra wa'aba tõ da, rob'rãsutuzéb ãma hã. ãne taré 'mairosa'rata aba wamhã, ma tô Zezu Cristuhu wi asina ai'maipahã wa'wa, asimirosa'rata na. Ahã wa, ma tô 'rãwi asiwi ĩ'maiwẽ'õ wa'wa, 'Re ĩhãimana u'ãsi mono nhoprubzé hã Cristu tidã'ázém na, te te 're ĩda'anho'reptui mono zéb da hã. ⁵ ãnei õ di, wa norĩ hã. Cristu Danho'reptui'wa na, wa tô wasina wa te 're saze za'ra. Taha zarina, wa wasina sô 're wanhimipari za'ra, rob'rãsutuzéb ãma hã, 'Re ĩhãimana u'ãsi mono te te wama ĩwaihu'u za'ra zéb zô, wawasédé te te oto wa'ãma 're ĩ'ab'madã'ã mono õ zéb zarina, te te 're ĩwa'awẽsãmri mono zém na. ãne 'Re ĩhãimana u'ãsi mono pẽ'ezani te te wama 're ĩ'awaihu'u mono zéb zarina, wa wasina sô 're wanhimipari za'ra oto. ⁶ Simisutu Cristu Zesusihi nhib'a'uwẽ oto 're wanomro mono wamhã, 'Re ĩhãimana u'ãsi mono hã te te 're wa'aba'a mono õ di za, ĩsihãiwata nhihãri ré norĩ hã, ĩsihãiwata nhihãri õ norĩ me. Zudezu na duré zudezu'õ na 're ĩwahãimana za'ra mono zém na hã, te te oto 're wa'awaihu'u mono õ di za. Zezu Cristu Danho'reptui'wa na, wa te wasina 're umnhasi za'ra mono wa, wanhimizawi pese na 're ĩwahãimana za'ra mono zém na si, te za oto te te 're wa'awaihu'u, 'Re ĩhãimana u'ãsi mono hã.

⁷ A norĩ wa'wa hã ma tô aré tô sena rowasu'u na 're anomro aba mo. E 'wa simirowasu'u hawi, ma tô sena rowasu'u na asima ãma apa za'ra wa'wa. ⁸ E asima ãma apa za'ra wa'aba da, ma tô 'Re ĩhãimana u'ãsi mono hã aima waihu'u za'ra wa'wa, sima asô ĩhãrã za'ra wa'wa hã. Mare di. ⁹ ĩrãda hã wa za aima sadawa wahutu za'ra wa'wa, ãne: "Ĩ'u'etẽ wapuzé hã syryre na da te ahiri nherẽ, te za timapu, ĩ'u'etẽ wapu hã." Tane duré aimawi na, da te dama 're rowasu'u za'ra mono wamhã, te za da te ãma 're ropé, rowasu'u senai'õ na hã. ¹⁰ Tane nherẽ, simisutu Wanhã'apito nhib'a'uwẽ 're wanomro mono wa, wa za te 're ai'umnhasi za'ra wa'wa, te aima ĩwaihu'u za'ra wa'aba zéb zarina si, za apã 're aihãimana za'ra wa'aba mono na. Aibã hã dama pire na 're hãimana mono nherẽ, aimawi tinhimirowasu'u na te te aiwi 're ro'wa'rutu za'ra wa'aba

mono wa, tãma 're rowẽ mono õ di za, ta hã 'Re ìhâimana u'âsi mono si za te te azãri wa.

11 Ìsisãnawã norĩ, wedepo'o nnonhi'rãmi na Zezu Cristu dazada ìdã'ázé hã wa tô te dama 're wasu'u u'âsi, da te ãma 're saze za'ra mono da. Taha wa, ma tô zudezu norĩ hã te te siwi 're ìwẽ'õ za'ra, ìmreme zarina te dama 're rowasu'u mono õ wa. Ta norĩ hã te duré taré te te dama 're ìwasu'u za'ra, danhihãiwata nhihãri wapsi, 're dasizudezu za'ra mono da, te dama 're awaihu'u mono newa. ãne zahadu zudezu'õ norĩ ma, te 're arowaihu'u mono 'wa'ãhã, e te aré zudezu norĩ hã te te siwi 're ìwẽ'õ za'ra, te dama 're ìrowasu'u mono zém na hã. Mare di. Te te siwi 're ìwẽ'õ za'ra mono õ di aré ãma. 12 Aimawi tinhimirowasu'u na te te aiwi 're ìro'wa'rutu za'ra wa'aba mono norĩ hã, tinhihãiwata nhihãri siré, te za pé 're si're zani za'ra, wẽ te bã.

13 Ìsisãnawã norĩ, 'Re ìhâimana u'âsi mono hã ma tô aima pisutu za'ra wa'wa, rowẽ na ãma 're aihâimana za'ra wa'aba mono da, ìsimiroti na rob'ui'ére 'rata zarina, 're ìrob'manharĩ za'ra wa'aba mono zém na 're asõpré wa'aba mono tõ da, taha zarina, 'Re ìhâimana u'âsi mono te te 're asõ'reptu za'ra wa'aba mono dai õ wa. Tane nherẽ, rowẽ na 'Re ìhâimana u'âsi mono ãma 're aihâimana za'ra wa'aba mono wẽ te, marĩ ìwẽ'õ na aip'ẽ'ẽ 're, asima 're rosa'rata za'ra wa'aba mono wamhã, asina ãma 're rob'manharĩ za'ra wa'aba mono õ di za. ãne te za oto 're anomro aba mo. Asimizawi pese za'ra wa'aba zéb zarina si, te za 're asipawaptob za'ra wa'aba mo asib'rata na, asimarĩ na zama, asimiroti na zama. 14 'Re ìhâimana u'âsi mono nhimiroti 'rada hã ahã uptabi nherẽ, simisutu haré te wasu'u, ìsimiroti hã ãne: "Ma'ãpé, 're dazawi pese za'ra wa'aba mono za. Marĩ ìwẽ na asima 're ìrosa'rata za'ra wa'aba mono ne, te za duré dama zama sô 're asõpré wa'aba mo." ãne si ìsimiroti hã. 15 Tane nherẽ, abaze zahi 're ìsisimroi mono ne, asisada 're asiti'rui u'âsi za'ra wa'aba mono wamhã, asina asapa'a za'ra wa'aba õ di za.

Wamama pẽ'ezani nhimiwada'uri zarina si, rowẽ na 're ìdanomro mono zém na rowasu'u

16-17 Wa norĩ hã marĩ ìwẽ'õ na ãté 'rãwi wap'ẽ'ẽ 're, wa za wasima wa te 're rosa'rata za'ra. ãne na te te sima 're wa'awẽ mono õ di, 'Re ìhâimana u'âsi mono pẽ'ezani hã. Marĩ ìwẽ na si 'rãwi wap'ẽ'ẽ 're, wa te wasima 're rosa'rata za'ra mono da, te za te te sima 're wa'awẽ. Tawamhã marĩ ìwẽ'õ na 'rãwi wap'ẽ'ẽ 're, wa te wasima 're rosa'rata za'ra mono wamhã, te za te te 're wa'auwati, 'Re ìhâimana u'âsi mono pẽ'ezani hã, wa te wasina ãma 're rob'manharĩ za'ra mono tõ da. Taha wa, wa za ãne aima waihu'u za'ra wa'wa. Ma'ãpé, 'Re ìhâimana u'âsi mono pẽ'ezani nhimiwada'uri zarina si, 're anomro aba mono za oto. Tawamhã siwa'ru marĩ ìwẽ'õ na aip'ẽ'ẽ 're

asima 're rosa'rata za'ra wa'aba mono nherẽ, asina 're rob'manharĩ za'ra wa'aba mono õ di za. **18** ãne 'Re ãhãimana u'ãsi mono pẽ'ẽzani nhimiwada'uri zarina si, 're aihãimana za'ra wa'aba mono wamhã, ãsimiroti na rob'ui'éré 'rata zarina 're ãrob'manharĩ 'rata za'ra wa'aba mono zém na, 're asõpré wa'aba mono õ di za oto, taha zarina 'Re ãhãimana u'ãsi mono te te 're asõreptu za'ra wa'aba mono dai õ wa.

19 Dasi'uinhã na danhimirosa'rata wasété zarina 're ãdanomro mono zé wasu'u hã, wa tô waihu'u za'ra ni. ãne te 're danomro wasété. Siwa'ru te tiwasédé hã pi'õ na te te 're 'manharĩ u'ãsi za'ra, aibã na zama. Siwa'ru te dasina 're dahãimana za'ra. Danhiséb ãna, te marĩ ãwasédé hã da te 're 'manharĩ za'ra. **20** Duré 'Re ãhãimana u'ãsi mono upana, te romhãiba 'manharĩ ãma 're dawata za'ra. Te duré tãma 're damreme zusi. Duré abzé 'manharĩ'wa, te 're danomro. Duré te 're dasi'ruiwapari za'ra. Te duré 're dasisada'ãbã za'ra. Duré marĩ na te 're dasi'ruiwapari za'ra. Dasi'aba're na te 're dazahi za'ra. Duré marĩ ãwẽ zô, te dasima si 're danhopré. Te duré 're dasirême za'ra, rãwi dasi'rata 're dahãimana za'ra mono tã da. **21** Marĩ na te 're dasisõ'ru za'ra. Duré da'rã siwamnarĩ na te 're dahãimana za'ra, ãzézei'wa 're dahãimana za'ra mono wa. Datoi wasétére u, te 're dasi'rã'õtõ, siwa'ru da te 're ãhuri mono da, ãzé hã. Tane te duré 're hãimana, da te 're ãmanharĩ wasété za'ra mono zé hã. Taha wa, wa za ãma sahu, te aima ãwaihu'u za'ra wa'aba zém na. ãne 're danomro wasété mono wamhã, hãiwa u, 'Re ãhãimana u'ãsi mono u 're ãdanhisisi mono da hã mare di, Danhib'apito uptabi u, ãwẽ uptabi si, tinhib'a'uwẽ norĩ ma, te te tãma 're ãanhomri mono da hã.

22 ãne 're danomro wasété mono õ di za, 'Re ãhãimana u'ãsi mono pẽ'ẽzani nhimiwada'uri zarina 're danomro mono wamhã. Te za da te 're dazawi pese za'ra. Duré dap'ẽ 're datoi u'ãsi, te za 're dahãimana za'ra. Duré dap'ẽ toi u'ãsi, te za 're dahãimana za'ra. Duré dawara sina dasisada 're dazahi za'ra mono õ di za. Duré danhimizawi pese na te za 're dahãimana za'ra. Duré marĩ ãwẽ na te za dama 're danhoprub za'ra. Duré tô sena wa, ropisutu wẽ, te za da te dama ãma 're rob'manharĩ za'ra. **23** Duré dawaimri te za dama 're dahãimana za'ra. Duré dawasété wi, dasina 're danhiptete za'ra mono sina, te za 're dahãimana za'ra. ãne 're dahãimana za'ra mono tã da, 'Re ãhãimana u'ãsi mono nhimiroti hã robaba di. **24** Cristu Zezusihi nhib'a'uwẽ 're ãdahãimana za'ra mono norĩ hã, tiwasédé hã aré te te 're 'manharĩ ze za'ra mono nherẽ, duré tiwasété zô aré te te 're rowasutu za'ra mono nherẽ, rãwi te za te te siwi 're wẽ'õ pese za'ra, te te 're 'manharĩ za'ra mono tã da oto. **25** 'Re ãhãimana u'ãsi mono pẽ'ẽzani hã ma tô wama tisõ, wahãimanazép té hã ãwẽ hã. Taha wa, ma'ãpé ãsimiwada'uri zarina si, 're wanomro wẽ wa'aba mono. **26** Danhipai u, wapire na 're wahãimana za'ra mono newa,

'râwi wapê'ê na wasina 're wawata za'ra mono ô di za, da te wama 're nharĩ za'ra mono tō da. Duré wanhipai u, dapire na 're ïdahâimana za'ra mono na, wa te 're da'ruiwapari za'ra mono ô di za.

Roti ïwê na 're ïdasipawaptob za'ra mono zém na rowasu'u

6 ¹ Ìsisānawā norĩ, āne wa za duré aima waihu'u za'ra wa'wa. Āté ni'wa hã te za tihâimanazém na upa. Tawamhã 'Re ïhâimana u'âsi mono pê'êzani nhimiwada'uri zarina si 're aihâimana za'ra wa'aba mono wamhã, te za aiwaimri 're ïpawapto pese za'ra wa'aba mo, apâ 're hâimana wê mono da, ni'wa hã. 'Re pawapto za'ra wa'aba mono wamhã, ma'āpé 'râwi a'â asina 're asōpré wa'aba mono za, a norĩ wa'aba zama, wa'rui'wa nhimiwada'uri zarina, aihâimanazém na 're upa za'ra wa'aba mono tō da. ² Marĩ wa, aiwi 're robzei'ô za'ra wa'aba mono wamhã, ma'āpé 're asipawapto pese za'ra wa'aba mono za, roti ïwê na si. Āne wamhã, Cristuhu nhimiroti wê 'madâ'â wa te za tō 're aihâimana za'ra wa'aba mo. ³ Āté ni'wa hã simiroti pire newa, te za 'râwi tinhimiroti pire na 're si'madâ'â ze. Āne wamhã, 'râwi te za tipê'ê na sima 're sadawa nhipese. ⁴⁻⁵ Romhuri hã te wama 're hâimana za'ra wahâiba mono bâ, wa te wasina 're ï'madâ'â pese za'ra mono da hã. Āne wa, wa za aihĩni 'râwi wa te wasima 're rosa'rata pese za'ra, wa te wasina 're 'madâ'â pese za'ra mono da, wanhimirohmuri hã. Wa te wasina 're 'madâ'â pese za'ra mono wamhã, wa za 'râwi wapê'ê 're wasima 're wato za'ra. Danhimirohmuri hã wanhimirohmuri me aiwab ô na, wa te da'āma 're rosa'rata za'ra mono ô di za.

⁶ Āté ni'wa hã Zezu Cristuhu wasu'uwê na, te za te te 're aipawapto za'ra wa'wa. Āne wamhã, te za asimarĩ na tãma 're asōprub za'ra wa'aba mo asa.

⁷ Ma'āpé ïwapari pese za'ra wa'aba za. 'Re ïhâimana u'âsi mono wi, simani ô di za, dahâimana wê wa'rãmimhã, ïwê na te te dama āma 're ï'a'uwaimrami mono da hã, duré dahâimana wasété wa'rãmimhã, ïwasété na te te dama āma 're ï'a'uwaimrami mono da hã. Āhã wasu'u hã tō sena wa, senai ô na āma 're rosa'rata za'ra wa'aba mono ô di za, 'râwi aipê'ê 're asima 're asadawa nhipese za'ra wa'aba mono tō da. ⁸ Danhimirosa'rata wasété zarina 're danomro u'âsi mono wamhã, te za 'Re ïhâimana u'âsi mono nhiti 're dahâimana u'âsi za'ra, rowê ïsi'utōrĩ'ô nhiti. 'Re ïhâimana u'âsi mono pê'êzani nhimiwada'uri zarina si 're danomro mono wamhã, te za rowê ïsi'utōrĩ'ô āma 're dahâimana u'âsi za'ra, 'Re ïhâimana u'âsi mono 'rata. ⁹ Taha wa, ma'āpé wawa'a āna marĩ ïwê na, wa te 're dapawapto u'âsi za'ra wa'aba mono za, wa norĩ hã. Tawamhã bâdâ ïwa waptâ'ã wapsi, 'Re ïhâimana u'âsi mono te te wa'āma sima ïrotizé hã te za ïwa'rãmi marĩ ïwê hã te te wama 're anhomri. ¹⁰ Āne wa, wama ïwaihu'u pese zarina, wa za dahâiba mono bâ

marĩ ĩwẽ na, wa te 're dapawaptob za'ra. Wa te 're ĩdapawaptob za'ra mono zém nhipai u, wa za wasiré ĩsazei'wa norĩ hã marĩ ĩwẽ na 're wasipawapto pese za'ra.

Paru hã roti na te te ĩrãsutuzé wasu'u

11 Āhãta ĩnhimi'ui'éré ĩsa'ětē na, wa aima rob'ui'éré za'ra wa'wa, ĩsi'uihã na ĩnhib'rata na. 12 Ni'wam norĩ hã ma tô te te aima 're roti zadawa za'rėi'õ za'ra wa'wa, asihãiwata nhihãri ré, 're anomro aba mono da, tawapsi asizudezu za'ra wa'aba da. E marĩ da. ĩsiré zudezu norĩ si ãma 're wata za'ra mono da, te te aima ĩroti za'ra wa'aba zém na hã. Cristu wedepo'o nhonhi'rãmi na wazada dâ'â wamhã, ma tô wa'awa'ãbã pa. Tane nherē, taha wasu'u si te te aima 're wasu'u za'ra wa'aba mono õ di, ĩsimirowasu'u na te te siwi 're wẽ'õ za'ra mono tõ da, ĩsiré zudezu norĩ hã. 13 Ta norĩ hã sihãiwata nhihãri ré, 're nomro mono nherē, uburé marĩ na 'Re ĩhãimana u'ãsi mono nhimiroti 'rada hã te te sina tãma ãma 're uwaimrami za'ra mono õ di. Tane nherē, ma tô te te sima 're aiwẽ za'ra wa'wa, ĩsimiroti zarina, aipibu pese na 're anomro aba mono da, ĩré 're anomro aba mono wa, tisiré zudezu norĩ ma, sina 're wata za'ra mono da, ĩsimiroti zarina oto 're ĩaihãimana za'ra wa'aba mono na hã. 14 Tanei õ di, wa hã. Wanhib'apito Zezu Cristuhu ãma si, wa za 're ĩwata u'ãsi, wedepo'o nhonhi'rãmi na wazada ĩdã'â ãma. Taha wa, tiza'ozém na wazada dâ'â wa, ĩwi 're ĩdadã'â za'ra mono ne, duré wa hã dawĩ ĩdã'â ne, ti'ai ãma danhimirosa'rata na 're ĩhãimana mono õ di oto. 15 Danhãiwata nhihãri ré si, 're ĩdahãimana za'ra mono zé hã, marĩ dai õ di, 'Re ĩhãimana u'ãsi mono ma hã. Duré danhãiwata nhihãri ãna 're ĩdahãimana za'ra mono zéb zama marĩ dai õ di, tãma hã. Dahãimanazép tém na, ĩwẽ na si oto 're dahãimana za'ra mono wamhã, taha si tãma wẽ uptabi di. 16 Ōhõ wasu'u zarina 're dahãimana za'ra mono wamhã, wa ĩsima te 're da'awẽ, rowẽ na 're danomro mono da, 'Re ĩhãimana u'ãsi mono da'ãma 're ĩpẽ'ézé mono zéb zarina. Taha da, wa za da'ãma te tiwi 're rowaptērē u'ãsi, uburé 'Re ĩhãimana u'ãsi mono nhib'a'uwẽ norĩ ãma.

17 Wa hã Zesusihi ma romhuri'wa, wa 're ĩhãimana, ĩsimiwada'uri na. Da te ĩma 're ĩrob'manharĩ wasété za'ra mono zéb zarina, ĩhãiba hã'ětē ré, 're ĩmorĩ wa, ĩpibui pese di, tãma ĩromhuri'wa 're ĩmorĩ na hã. Te te oto sahari za'ra, aimawi tinhimiroti na te te ĩwi 're ĩro'wa'rė za'ra mono norĩ hã.

18 ĩsisãnawã norĩ, Wanhib'apito Zezu Cristuhu wi, wa za te tiwi 're rowaptērē u'ãsi, aihãiba za'ra wa'aba na hã, tãma asawi za'ra wa'aba wa, te te 're aipawaptob u'ãsi za'ra wa'aba mono da.

Tane tô.